

滇海虞衡志
附校勘記
（一一）
涼州異物志





滇海虞衡志

附校勘記

(二)

檀萃輯

編主五雲王

編初成集書叢

種一他其及志衡虞海濱

冊 二

中華民國二十五年十二月初版

發行人

王雲五
上海河南路

印刷所


商務印書館
上海河南路

發行所

商務印書館
上海及各埠

◆D七一二

密



叢書集成

初編

主編 王雲五
編者 王雲五

商務印書館發行

滇海虞衡志卷九

志花

志花就所見而志之

滇南茶花。甲於天下。昔人稱其七絕。而明巡按鄧漾以十德表之。稱十德花。此花宜爲第一。紅梅莫盛於滇。而龍泉之唐梅。騰越之魯梅。見於畫與傳者。光怪離奇。極人間所未有。此花宜爲第二。紫薇花樹。旣高大。花又繁盛茂密。多植於官署庭堂。滿院絳雲。不復草茅氣象。此花宜爲第三。滇無鼎甲。以三花鼎甲之。足以破荒而洗陋矣。此固花王得以開科。花神讀之。得以品第進呈者也。美矣尙矣。至其他之奇出者。以類次之。

龍女花。天下止一株。在大理之感通寺。猶瓊花亦止一株。在揚州之蕃釐曠也。昔趙迦羅修道於此。龍女化美人以相試。趙以劍擲之。美人入地。生此花。以供奉空王。至今數百年。緣分已滿。樸菴子。迦羅之後人也。前年來言此花忽被天上收去。如瓊花匿無影矣。予同官多見龍女。予來此已久。放廢羈離。不能自便。而龍女亦不及相待以獻珠。何緣分之慳哉。故命一清寫其像於蝴蝶陽秋。志不忘也。

優曇花。滇中頗多。花青白無俗艷。誠佛家花也。優鉢曇花。一年一見。一見之後。於是我佛乃說妙法蓮華經。經流傳人間。花亦不復收去。俾人間見花。卽如見我佛。是從前之千年一見者。今則日日見之矣。亦可

以無疑於其多矣。

扳枝花者。木棉花也。金沙江熱地方多有之。元謀繞署皆扳枝花。樹高大亦如粵。但花色微淡。且稀疎。不及粵之深紅。縣密。遠望如紅錦攢於雲端。爲差減耳。其花可以炙食。花卸結角如大肥阜。裂開則柳絮輕盈。飛空捲地。蓋瓦縈牆。其茸甚滑。而病於太短。不能如吉貝之易縷牽連。苟設法而匠運經營。未嘗不可同歸於杼軸。古者布有橦華。何知不織此花乎。蓋橦者高也。木棉高大似建橦。故以橦華名。西方女工。巧過中土。豈肯專用吉貝而舍木棉。吉貝草棉。對木棉以爲配。木植中國最早。不知用之。草棉進自宋元間。至今衣被天下。自有棉花。桑蔴漸就荒廢。此亦物用運會之大變局也。棉花足用。世爭蒔之。何從復返中國。雞犬桑蔴之盛哉。按橦華不知爲何樹。考蜀都賦。註引張揖云。橦華者。樹名橦。其花柔脆。可績爲布也。出永昌。今永昌無橦木。止有扳枝木。而故志附扳枝花於桑柘蔴棉之後。爲其可績爲布也。是知攀枝木本名橦木。木高大。必攀枝取花實。故曰扳枝木。實有棉。故曰木棉。後漢哀牢傳。以橦作桐。曰梧桐木華。績以爲布。幅廣五尺。潔白不受污垢。先以覆亡人。然後服之。註謂梧桐有白者。剽國有桐木。花有白毳。取其毳淹漬。緝織以爲布。今廣東人見木棉之絮輕滑。茸短。不可捉緝。間掃地收茸。以裝襪及坐褥。馬屨。市者謂用之。則蝕血傷膚。故不售。若按註。必淹漬而後可緝織。猶蔴之必漚。絲之必煮。而後可治也。必經覆亡人而乃服之。或亦厭勝之法。不生他病也。第棉花之利。雖倍於桑蔴。而種植耘鋤。男女奔忙。視夏畦尤病苦。今內地諸省多種棉花。而兩廣滇黔。究不宜於吉貝。炎陬瘴澁。扳枝相望如雲。若使遠求夷人修治之。

法製而用之。出布以濟蠻疆。尤爲大利。其樹旣易生長。添種益多。不勞於耕穫鋤耘。坐收其利。勝於棉花矣。且物產廢興無常。或廢棄歷數千百年。不知收用。一旦發出。盡識其利。相與從事不倦。殆五六百年。幾以棉花爲中國從來自有之物。豈知宋元間中國始大興哉。木棉樹布於各省。想其有亦自開闢而來。唯夷人或得其用。而漢人不知也。棉花之有。想亦當然。不過自開自落於荒洲孤島中。島人入貢。不過曰卉服云爾。宋元大興。中國知棉花。幾不知桑麻。而棉花果利於桑麻。若使解製木棉花。得成爲布。其便利尤出棉花之上。可惜數千百萬木棉。棄之於炎區瘴溼之中。而無以効用於人世也。悲夫。○明統志載永昌細布。桐花織爲之。潔白不受垢。則前明固知木棉可織矣。織法須從蠻姝處問之。滇志姚安木羅布。卽撞布也。撞木皮可爲布。按緬甸亦出草棉。由永昌販至彌渡。分寶各府。其利甚重。

刺桐花。滇名鸚哥花。葉如梧而蔽。花亦巨而鮮。但取其枝插之。卽易生如青桐也。木質輕鬆。亦似青桐。官府取以爲杖。嘗命地方頭人取數十捆。分植於農部之南郊官路旁。陰濃花繁。行人悅憩。迨予于役三年。回而已無矣。所植城中桃李夾街。亦皆伐去。西園花木。廢爲馬隊。則接政之爲也。敗於俗吏。念之能無慨然。

佛桑花。亦佛國花也。枝葉如桑而叢生。花輕紅婀娜可愛。佛坐桑下。僧曰桑門。宜桑之獻花。遶佛而爲供養。此佛桑之義也。妄者改名扶桑。失其義矣。永昌產吉祥草。亦佛所坐之草也。此皆如來遺迹。滇俗所皈心。儒官爲治在因俗。何必執闢佛之見。易其名哉。

范志載花十六種。除標山茶於前。而凡上元紅、白鶴紅、荳蔻、泡花、紅蕉、枸那、史君子、裏梅、象蹄、素馨、茉莉、石榴、添色芙蓉、側金盞、共十五花。粵有滇卽有。今按紅蕉、纖細亦不足觀。裏梅卽木槿。插籬落者亦奚奇。榴花中土最多。金盞階砌草。更不堪入目。至於素馨品極賤。蔓延牆壁。曾不能與薔薇爭奇。而滇人矜之。以爲出於大理國主段素興。因名所愛之花曰素興花。一曰素馨花。夫段素興者。則野史所謂之天明皇帝也。卽位於宋仁宗慶曆時。四年見廢。是時宋與大理不通。范公作志當孝宗時。其外斥滇南。輒曰西番。曰南蠻。曰蠻國。不應錄其花。著其國主之名。而志中已有此素馨花。與茉莉爲儔。俱出於番隅。不因天明之愛而始著。曰素馨者。爲其白而香耳。牽輿爲馨。於義安居。今日木香花。按木香花別是一種。木香木本素馨藤本也。

范志十六花。不及蘭。滇粵連界。滇蘭多詭異。粵豈無之。其不入志。或偶遺耳。滇中虎頭蘭。蘭中壯巨者。花而不香。又有風蘭。畜之煙牕風架。乃蕃如仙人掌。李厚岡治恩樂。搜哀牢山蘭甚多。以木斗運省。招予賞之。其奇異之品。皆世所未見。近檢張記有神品蘭。蓋硃砂蘭也。葉似建蘭稍大。莖高尺一。莖十餘花。色如渥丹。香清冽。過諸種。開於夏秋間。本出老撾孟艮土司地。新興人善養之。蒙化差劣。他郡養之。則不花。嘗載至維揚。人爭來看。門幾如市。性不耐寒。冬卽槁。故稱爲神品。又有雪蘭。一莖三花。瓣如通草。心吐微紅。葉柔如線。迎年而開。秀美怡人。滇人蓄蘭多建蘭、魚魷蘭。皆來自粵閩。非滇產。產則虎頭風蘭俱粗。惟厚岡所得。與張君所記。皆產自滇。一洗虎頭風蘭之陋。若使人爭畜之。以市於中土。則滇蘭未嘗不與建蘭東西競爽也。蘭爲王香。奈何遺之。升菴謫滇。乃賦伊蘭。是伊蘭又出於滇也。序稱江陽有花名賽蘭香。

不足於豔而有餘於香。戴之髮紒。經旬猶馨。古者級佩頽浴皆是物。西域有伊蘭。以爲佛供。卽漢書所謂伊蒲之饌。滇爲佛國。宜產此蘭。然伊蘭卽猗蘭也。夫子操之。如來饌之。其重如此。顧可略乎。猗蘭亦作花。古人不取花而取葉。所以爲容臭。今特附於蘭花後。朱砂蘭卽紅蘭。江淹別賦所謂見紅蘭之受露。是中國原有此蘭。今獨見於滇也。白蘭卽粵東素心蘭。純白品極貴。畜此可防產厄。客粵時。莊生曾以一盆相貽。

滇俗重木香粉團金鳳。小兒女爭戴之。木香論圍。粉團論朶。金鳳作串。插於藁。高至盈丈。如霞之建標。呼於市而貨之。頃刻俱盡。此皆窮民賴以爲衣食之資者。則花之濟於芸芸亦大矣。石虎關民爭種菊。人肩車載而入於市。卽以爲菊莊收成。可不謂花農乎。亦種雞冠。供中元祀祖。卽棄之矣。菜海邊多花院子。各花俱備。以供衙門及公館。名繁不勝計。民生利用多出於花。故述而載之。

杜鵑花。滿滇山。嘗行環洲鄉。穿林數十里。花高幾盈丈。紅雲夾輿。疑入紫霄。行彌日方出林。因思此種花。若移植維揚。加以剪裁。收拾蟠屈於瓊砌瑤盆。萬瓣朱英。疊爲錦山。未始不與黃產爭勝。而棄在蠻夷。至爲樵子所薪。何其不幸也。

馬纓花。冬春遍山。山岷折而盈抱。入市供插瓶。深紅不下於山茶。製其根以爲羹匙。堅緻勝施秉。又有白馬纓亦可玩。而艷麗終不及紅也。粵中亦有馬纓花。非此花也。

含笑花。土名羊皮袋花。如山梔子。開時滿樹香滿一院。耐二月之久。他如牡丹、芍藥、桃、李、梨、杏、海棠之類。

不可勝紀。其艷麗俱與內地同。不贅陳也。○按杜鵑、馬纓、含笑、三花。開時滿山。秋冬則砍以爲柴。餘幹再發。仍滿山。惟某廳含笑一株成拱。余因效之。命山人移一兜植於西園。不及見花。而予已去矣。滇南蓮華特異。古云已開爲荷花。未開爲菡萏。本一花。而因開與未開以異名。至滇始知荷花開而結實。菡萏合終。不開不結。實蓋兩物也。其最奇者。花一朶而半白半紅。廣通學宮出此花。予爲記之。

滇海虞衡志卷十

志果

范志取南果以子名者。錄其可識。皆猿狙所甘之殘餘。言不當也。茲所志歸于雅馴。

松子爲滇果第一。中國所產。細不中噉。必資于關東。三稜而黃。滇所產。色黑面圓而底平。其松身似青桐。葉五鬣七鬣而深濃。高不過一二丈。此結松子之松也。毳長一尺。火煨而剝之。兒童爭啗。如包穀。迄至成熟。大擔而塞于街。值不甚高。市升僅數十錢。

查。巨亦甲天下。樹高大如柞櫟。查餞查膏尤佳。

蘋婆果。南中。最少而滇出盈街。

花紅林禽亦然。

梨。兩廣無而滇最多。楚雄之梨。黑似壞者。乃繫本色。味佳也。

桃。以富民白皮爲上品。榴則重乎阿迷。梅杏李柿棗栗雖多。不聞有所著名也。著名則地方官民之累矣。香櫞。佛手。柑之大者。直如斗。重三四斤。皆可生片以擺盤。二物經霜不落。在枝頭歷四五年。秋冬色黃。開春回青。吳學使應枚詩。碩果何曾怕雪霜。樹頭數載歷青黃。是也。

荔支。龍眼。古書出于川滇。左賦稱蜀之前。旁挺龍目。側生荔支。謂滇南也。唐宋時。嘉戎多有荔枝。白樂天

守忠州。寫圖以寄京師。交好。今不聞。川有荔支。惟滇之元江。尚不得辭其名。每年以進各衙門。而累不免。恐後來元江亦告無矣。

龍眼絕不見。

黃果。出迤西橘柚之類也。滇人名之爲黃果。

核桃。以漾濞江爲上。殼薄。可捏而破之。

橄欖。江邊瘴地俱有之。葉如狗骨子。如苦棟。小兒喜食之。恐非真橄欖。大抵探子榴子之類耳。故其味酸。葡萄。滇南最佳。然不能乾而貨于遠。櫻桃。楊梅。枇杷。木瓜。榛。榧。銀杏。亦然。過時則不可得。惟楊梅尚有酒浸之者耳。

檳榔有數種。滇南所產。惟殼檳榔。穿之成串。以相遺。但半殼。細剝殼裏。以灰食之。然非樹生。乃出籐本。籐緣崖行。實纍纍相懸。爲檳榔。第檳榔本出高樹。萑子。乃出籐蔓。原各殊。今殼檳榔出于籐。其籐大抵扶留之別種。其實氣味頗似檳榔。故以殼檳榔名之。實非檳榔也。按籐生爲馬檳榔。一名馬金囊。馬金南。紫檳榔。李時珍謂生金苗。元江諸夷地。蔓生結實。大如葡萄。紫色。味甘。內有核。頗似大風子。而殼稍薄。圓長斜扁不等。核內有仁亦甜。凡嚼以冷水送下。其甜如蜜。亦不傷人。又治產難如神。而今滇人食馬檳榔。不用冷水。而用萑灰。殆以馬檳榔爲廣檳榔矣。況廣檳榔亦非真檳榔。乃大腹檳榔。豬檳榔也。出嶺表。滇南卽檳榔中一種。腹大形扁。而味澀者。不似檳榔尖長。而味良。彼中皆呼爲檳榔。并籐灰同食。則又以大肚子

爲眞檳榔矣。雲南記云。大腹檳榔。每枝有三百顆。青時剖之。以蓐灰同食。卽減澀味。而非馬金囊之殼。檳榔也。檳榔以出交愛爲眞。從洋船至。所謂海南雞心檳榔也。以供客敬。而入藥。則用圓扁之大腹檳榔也。滇之迤南。與交愛隣。諸土司之中。應出眞檳榔。而皆由海舶入廣。其遺滇食者。則馬金囊也。而蓐灰和食。以矜重。不亦誤乎。又按明統志。載永昌土產紫檳榔。馬金囊。狀類白荳蔻。嚼塗惡瘡甚效。或食一枚。飲水卽無所傷。則是猶未敢通行食之。比檳榔也。滇志謂元江出檳榔。審其形。似卽雲南記所謂大腹檳榔也。夫古記且于大腹辨之嚴。不使統同混稱。況以蔓生之馬金囊。爭目爲殼檳榔。以混于木生者乎。故詳考之以蹠其實焉。

蓐本爲蒟。蜀都賦注。蒟。醬也。緣樹而生。子如桑椹。熟時正青。長二三寸。以蜜調而食之。辛香溫。調五臟味。註意似以蓐子擣爛。蜜調之爲蒟醬。猶今之杏醬也。列于醬豆。以醢各殺。饌而食之。不言和嚼檳榔也。此蜀人之食法也。至註吳都之扶留。曰籐也。緣木而生。味辛可食。檳榔者。斷破之。長寸許。以合石黃灰與檳榔并咀之。口赤如血。始興以南皆有之。似當日斷椹以和食。不用葉留者。蓐也。故實曰蓐子。葉曰蓐葉。粵食今不用子而用葉。斷檳榔破爲兩片。每片裹蓐葉。葉抹蠔灰。謂之一口。每宴會則取數百口。列于中座。佐以盆灰。今滇俗猶粵。大重檳榔。茶不設。則生嫌悵。但無蓐葉。惟剪蓐子。雜檳榔片和灰食。此吳人之食法也。元江又分蘆子蓐葉而二之。謂蘆子產山谷中。蔓延叢生。夏花秋實。乾之以爲貨。則是今蘆子拌食乾檳榔。且以助染綱者也。蓐葉家園遍植。葉大如掌。疊藤于樹。無花無實。冬夏嘗青。採葉合檳榔食之。味

香美。則猶粵人捲葉以食鮮檳榔者也。然皆蒟也。蒟分兩種。一結子以爲醬。一發葉以食檳榔。海濱多葉。而滇黔無葉。以其子代之。或作蘆。或作蓐。其義一也。京師亦然。檳榔旣入果部矣。蓐應相隨。故次檳榔而志之。

波羅蜜。安南名曩伽結。波斯名婆那娑。拂林名阿薩躡。南方番國產也。而雲南早有之。考前明統志。永昌土產波羅蜜。實大如瓜。味甘酸。想統志亦因郡邑志而載之者。必實有此果也。范志桂海旣有此果。滇海豈其獨無。而滇志及新永昌志俱遺之。何其闕也。果之巨者無如椰子。波羅蜜。波羅蜜。梵語味甘也。李時珍云。今嶺表滇南亦有之。樹類冬青。高五六丈。葉極光淨。實出枝間。大如冬瓜。重五六斤。剝去層皮。味極甜美。予客嶺表見之多。居滇竟未之見也。又不花而果者。不獨波羅蜜也。

優曇鉢。一名無花果。李時珍曰。出揚州及雲南。折枝插成。樹如枇杷。實出枝間。如木饅頭。其內虛軟。鹽漬壓扁充果食。又文光果。天仙果。古度子之屬。皆不花而實者也。

探子。賦于吳都。與留子並著。李時珍曰。探留。二果名。留一作劉。三月著花結實。七八月熟。色黃甘酢。生交廣武平與古諸郡。夫與古則今曲靖府也。劉子出于曲靖。則探子亦同與禦霜矣。麁目。鬼目也。與古郡亦出之。樹高大如棠梨。葉似楮子。大如木瓜。小如梅李。蜜浸食佳。

都梔子。生廣南山谷。高丈餘。子如雞卵。亦似木瓜。以鹽酸瀉食。

都念子者。倒捻子也。樹高丈或二三丈。葉如白楊。枝柯長細。子如小棗。抑似軟柿。頭上有四葉如柿蒂。捻

其蒂而食。謂倒捻子。訛爲都念。外紫內赤無核。土人呼爲軟棗。棄之而不食。省城果舖收而以密漬之。遂列宴盤。是知美在所漬也。農部署前有一株。予每坐其下。以爲軟棗樹而已耳。今乃知爲都念。能無念之乎。

都咸子。生廣南山谷間。樹大如李子。如指。取子及皮葉乾之。以作飲。極香美。

韶子。生廣南。葉子皆如栗。有柿刺。肉如豬肪。核如荔枝。范志以爲山韶子。其籐韶子。大如梟卵。則柿也。軟棗之類也。

枳椇子。滇人呼爲拐棗。此皆山果之瑣碎雜橡栗而羅生者。亦附著之。以見山氓之所資爲利養。不可略也。

蕉子。佳果也。葉可書。皮可績。根卽蕺荷可蔬。一蕉而千寶。可賣千錢。曾於農部廣種蕉。冀與吾民開其利。至僑滇院亦然。四可無一。可僅與諸生常得綠陰映窗之趣焉。特著四可以見蕉之有資于民生固甚大。地氣旺時。制而用之。豈招蕉萃之棄哉。

大藥。鮮子。訶子。俱出土司地方。明統志云。鎮康州大藥有大如斗者。味極甘善。鮮子大如棗。味酸。大藥。蓋謂大山藥也。

落花生爲南果中第一。以其資于民用者最廣。宋元間與棉花蕃瓜紅薯之類。粵估從海上諸國得其種。歸種之。呼棉花曰吉貝。呼紅薯曰地瓜。落花生曰地豆。滇曰落地松。高雷廉瓊多種之。大牛車運之以上

海船而貨于中國。以充苞苴。則紙裹而加紅簽。以陪燕席。則豆堆而砌白貝。尋常盃杓。必資花生。故自朝市至夜市。爛然星陳。若乃海濱滋生。以醃油爲上。故自閩及粵。無不食落花生。油且膏之爲燈。供夜作。今已遍于海濱諸省。利至大。性宜沙地。且耐水淹。數日不死。長江黃河沙地甚多。若遍種之。其生必大旺。今棉花種于南北。幾壓桑麻。若南北遍種落花生。其利益中原尤厚。故因此志而推言之。

百合花。滇俗以插瓶。而其實則比佳果。以爲饋。出于曲靖南寧宣威。且洗之以爲粉。清香甚美。滇俗以臨安藕粉。南寧百合粉。宣威蕨粉。充官場餽送。

蓮子。出于澂江。比湖蓮爲巨。然蓮肉不能白脆。如建蓮。今餽送以桶盛。題面。輒曰建蓮。藕各處出。惟澂江洗之爲藕粉。以充苞苴。乾之爲藕片。以充齋供。片甚乾而巨。予糜而淪食之。卽成藕粉。亦郡產之佳。而可志者也。

菱頗有。然無巨者。以滇雲絕遠。而鱗被水。幾同江鄉。亦極樂國也哉。

慈姑烏芋。滇皆有之。同江鄉。綱目以入果部。慈姑一根。歲生十二子。如慈母之乳諸子。故以名之。一名白地栗。謂地栗之白者。別于烏苾之黑也。霜後葉枯。根乃練結。旋掘爲果。煮以灰湯。他處慈姑麻澀。而省上不然。則治之有法也。

烏芋。烏苾。俗呼勃薺。滇產有大如盃者。比栗爲大。蓋滇無巨栗。故地栗爲洪耳。

蔗糖名目至多。而合子糖尤盛。元謀臨安之人。多種蔗。熬之爲糖。糖凝堅厚成餅。二餅相合。名合子糖。臨

安人又善爲糖霜。如雪之白。曰白糖。對合子之紅糖也。其買賣大矣。

榧實一名玉山果。由坡公發明之也。爾雅。榧。粘榧轉爲裴。裴別爲榧。粘省爲杉。其有實也曰榧子。陶公別錄曰。榧實生永昌。榧子生永昌山谷。予于滇筵每食榧子。詢之。則自永昌販來者也。其木栢本杉葉而松理。肌細軟。堪爲器用。乃思古人之棐几。用此木爲之也。實殼薄。不似松子堅硬。可生啖。亦可焙收。一樹可收數十斛。江西玉山有之。能治小兒蟲疾。坡公詩。彼美玉山果。餐爲金盤實。斲出三彭蟲。已我心腹疾。玉山果由此名也。被葉似杉。絕難長結。榧實而木理有文采。爲特異杉耳。金沙江峒板。皆杉板也。想卽被木也。榧。被生于荒谷。人跡罕到。鋸其板內。有龍腦香。則其外之發爲榧子。歲收數十斛。又何足奇。以江鄉習見之木料。絕不經意。今乃于邊遠紀載而得之。甚哉。爲學之道。不可不隨處留心也。

崖蜜出於滇。山民因崖累石爲窩。以招蜂。而蜂聚其蜜甚白。真川蜜也。初涖農部時。值甚賤。近今客來收販。漸昂矣。亦地方之利也。嘗得蔣先生服茯苓方。茯苓三十斤。白蜜三斗。蒸擣三萬杵。服之。眼能夜視。發神光。農部辦二物甚便。彼時樂酒肉穿腸道在心。那暇及此。今悔之甚。武定山民有養至百窩者。家大饒。俗因謔爲蜂王。若和茯苓而服之。豈不成蜂仙乎。